

Rotonde di Pos Abou a habri

ORANJESTAD – Pa hopi tempo e crusada situa na Pos Abou dilanti di Texaco y Central di Taxi tabata un reto pa hopi usuario di trafico.

Esaki ya no ta e caso, ya cu un mini rotonde a keda construi aliviando asina e situacion na e crusada cu ta conoci pa ta uno hopi insegur.

Inversion minimo

Rotonde y mini rotondenan rond di Aruba a crea un miho fluho di trafico y hopi mas sigur. Luznan di trafico di otro banda ta rekeri un inversion mucho mas halto y tin un costo di mantencion hopi halto. Esaki sigur compara cu rotondenan cu ta rekeri

un inversion minimo y tin un costo di mantencion hopi mas abou. Den cuadro di esaki, a construi e mini rotonde cu a drenta den servicio fin di siman.

Aruba conoce diferente tipo y grandura di rotonde, di esun mas moderno y grandi (manera e spiraal rotonde di aeropuerto) te na un mini rotonde, manera esun den Driemasterstraat den bisindario edificio nobo di DIMAS y Labor.

Concepto ta funciona

Segun ing. Marlon Croes, director di DOW, nan a cuminsa cu mini rotonde tempo cu instalacion di luz di trafico banda di ex Marathon a cay y



no por a haya e cashi di computer cu ta controla e luznan. Pa evita e caos, nan a dicidi di construi e dos mini rotondenan den e area ey. E ta bisa cu aunke e trafico ta pega un rato durante oranan di scol, e fluho di trafico sigur ta miho di loke e tabata antes.

Mas rotonde

Pa motibo cu e concepto a funciona, a dicidi di implementa uno na crusada di Paradera y e crusada di Babin cu ta bay pa Jaburibari. "Ey tambe el a duna bon resultado y e ciudadanonan ta reacciona positivo riba nan uzo."

Ademas cu e ta un inversion relativamente abou, e ta mehora e fluho di trafico y ta hopi mas sigur. P'esey a dicidi pa bini cu uno na Pos Abou y na e crusada di CMB na Noord. Esun di Pos Abou, na crusada den area di e Taxi Central y Texaco, a keda cla y ta den uzo caba. Sinembargo e mini rotonde banda di CMB Noord ta planea pa cuminsa otro aña.

Segun Croes, den transcurso di e tempo cu ta bini, lo bay construi mas rotonde, manera uno riba Watty Vos Boulevard y un otro dilanti di Compleho Deportivo Frans Figaroa na Noord. □